

Habacuc

Campa hueli nochí tlajtlacolchihuaj

¹ Ya ni nopa tlajtoli tlen TOTECO nechnextili na niHabacuc, nitiocamanalojquetl.

² „Na niquijto:“ “TOTECO, ¿hasta quema tlamis nimitztzajtzilis xinechpalehuiqui huan ax tinechtlacaquilis? ¿Hasta quema tlamis nimitztzajtzilis para ayoc ma mosisinijcá tlacame, huan axaca hualas para techmaquixtis? ³ ¿Para tlen tijchihua ma niquita tlajtlacoli huan tlen ax xitlahuac mojmostla? Campa hueli nechyahualohuaj tlacame tlen tlaxolehuaj huan tlen temajmatíaj. Mojmostla mosencualanijtoque huan motehuiáj. ⁴ Huan yeca nopa tlanahuatili ayoc quichihuaj inintequi huan nopa tequitini ayoc tetlajtolsencahuaj xitlahuac queja tlanahuatíaj. Tlacame tlen fiero ininnemilis momiyaquilijtoque hasta quionpano ininmiyaca tlen cuajcualme huan yeca tlayacanani ayoc quichihuaj tlen xitlahuac. San tlacajcayahuaj ipampa se tlaxtlahuili.”

TOTECO tlananquili

⁵ „Huan TOTECO quiijto:“ “Xiquintlachilica nopa sequinoc tlaltini tlen inmechyahualohuaj huan ximomajmatica pampa nijchihuas se tlamatli ipan ni tonali pero ax inquineltocase yonque se inmechpohuilis para panotoc. ⁶ Quena, na niquintlalanas nopa caldeos tlen itztoque ipan se tlali tlen tlacame tlen fiero ininnemilis huan

tlen mosisiníaj. Yajuanti quinpactía nentinemise campa hueli ipan nochí tlaltepactli para moaxcatise caltini huan tlaltini tlen sequinoc iniaxca.

⁷ Yajuanti tlahuel mahuililme huan temajmatíaj. Quichihuaj san tlen quinequij huan axaca hueli quintlacahualtíja. ⁸ Inincahuayos motlalohuaj más chicahuac huan ax queja nopa tecuanime tlen inintoca leopardos. Tlacame tlen nopano ehuani achi más mosisiníaj que nopa lobos tlen nemij ica tlayohua. Nopa tlacame tlen tlejctotoque cahuatipa hualahuij nelchicahuac tlen se tlali tlen huejca. Temotihuettij nelchicahuac queja se cuajtli para quiitzquis se piyo huan nimantzi quistehuas para quicuati.

⁹ “Nochi yajuanti hualahuij para tlatehuise. Campa hueli yohuij nochí temajmatíaj. Quintzquitihualahuij tlacame queja imiyaca xali para quinhuicase quinquipanoltitij.

¹⁰ “Quinpinajtíaj tlanahuatiani huan quinpinahualtíaj tlayacanani. Quinhuetzquilíaj nochí altepetini tlen moyahualojoque ica tepamitl tlen tilahuac para quinmanahuisquía. Huan san quimontonohuaj tlali iica nopa tepamitl huan ipan tlejcoj para calaquise ipan nopa altepetl huan quintzquise itlacajhua. ¹¹ Teipa panoj huan yohuij queja elisquía se ajcomalacatl, pampa senquistoc tlaxolehuaj. Quihuicaj miyac tlajtlacoli pampa san quiitaj ininchicahualis queja elisquía ininteco.”

Habacuc sampa quipohuilá TOTECO icuesol

¹² „Na niquijto:“ ¡TOTECO, hasta huecjajquiya ta tiitztoya huan nochipa tiitztoc! ¡Ta tinoTeco Dios

tlen tiTlatzejzelotic! Ax timiquise. Melahuac ta tiquinpalehuijtoc nopa caldeos para techtlatza-cultise huan techxitlahuase ininpampa nopa huejhueyi tlajtlacoli tlen tijchijtoque. Pero ta, tiTOTECO, tlen titemachtli huan titechmanahuis. ¹³ Ta senquistoc titlapajpactic huan ax tijnequi tiquitas tlen ax cuali. Ta ax tijnequi tiquitas tlajtlacoli. Huajca ¿para tlen san tiquintlachilijtoc quema fiero tlacame techtlaijyohuiltíaj? ¿Para tlen ax tleno tijchihua quema nopa ax cuajcualme quintzontlamiltíaj tlen más cuajcualme que ya-juanti?

¹⁴ “¿Para tlen techitaj queja tielisquíaj timichime tlen itztoque ipan hueyi atl para tlacame ma quinitzquica huan ma quinmictica? Tijcahuilia tlen hueli techmictis. Titechchihuilitoc queja cohuame tlen ax quipiyaj inintlanahuatijsca para quinmanahuis. ¹⁵ Tlali Babilonia ehuani quin-quixtiaj nochí tlacame ica ininteposchijcol huan quinsentilíaj nochí ipan ininmatla. Huan ica ya nopa tlahuel mopaquilismacaj. ¹⁶ Teipa qui-hueyichihuaj ininmatla huan quitlatilíaj copali. Moilhuíaj para ica ininmatla moricojchijtoque huan cuali tlacuajtoque.

¹⁷ “¿Tijcahuilis para queja nopa ma quichihuaca para nochipa? ¿Tiquincahuilis ma quisenhuiquilica quintzontlamiltise tlaltini ehuani campa hueli ica nochí inincualancayo?

2

¹ “Nimoquetzas huejcapa ipan ni tepamitl campa nitlamocuitlahuía. Huan nitlachixtos

tlachque TOTECO nechilhuis. Nijchiyas quejatza nechnanquili ipampa nocuesol.”

TOTECO quinanquili Habacuc

² Huan TOTECO nechnanquili huan nechilhui: “Nochi nopa tlanextili tlen nimitznextilis para nimitznanquili, xiquijcuilo ipan se huapalí ica tlajcuiolli tlen huejhueyi huan tlen cuali nesi. Queja nopa tlen hueli tlen quipohuas huelis nimantzi motlalos para quinpohuiliti sequinoc.

³ Pero ni tlamantli tlen nimitzyolmelahuas ax panos nimantzi. Pero ica yolic monechcahuijtiyas nopa tonali quema temachtli panos tlen nimitzhuis ipan ni tlanextili. Intla tiquitas para ax pano nimantzi, amo ximocueso pampa temachtli panos. Xipiyá hueyi moyolo pampa ni tlamantli panos senquistoc queja nimitzilhuía ipan nopa tonali tlen niquixtlalijtoc.

⁴ “Xiquijcuilo: ‘Se tlacatl tlen ax cuali mohueyimati miyac huan san motemachía ipan ya iselti, pero se tlen itztoc xitlahuac iixpa TOTECO, itztos para nochipa pampa quineltoca TOTECO.’

Tlen ininpantis inincualancaitacahua

⁵ “Nojquiya nopa tlaili tlen quinpartía quiij quincajcayahua huan quinchihua ma mohueyimatica. Pero ax huejcahuase. Ininyolo nopa ax cuajcualme tlahuel quiixtocaj miyac tlamantli tlen sequinoc quipiyaj. Pero yonque quinsentilise miyac tlacame tlen miyac tlaltini para ini-axcahua, ax paquij. Noja quinequij quipiyase más. Itztoque queja miquistli huan mictla tlen ax quema temitoc. Nochipa quinequij más. ⁶ Pero ajsis tonali quema nochí tlen quinitzquitoque

san quinhuetzquilise huan quiijtose: ‘Inteicneltzitzti imojuanti tlen inmoricojchijtoque ica tlamanli tlen ax imoaxca huan inquiimiyaquilijtoque tlamanli tlen inmechprendajcahuilijtoque. Ya ajsico imotlatzacuiltyil. Ama inquiselise imotlaxtlahuil pampa intetlaijiyohuilitijtoque huan intetlaxtequilijtoque.’

⁷ “Quema ax inquichiyaj, motlalanase tlen inquintlahuiquiláj huan tlahuil inmechmajmatiquij pampa hualase campa imojuanti ica nochi inincualancayo huan quihuicase nochi tlen inquipiyaj. ⁸ Inquintlaxtequilijtoque tlahuil miyac tlaltini huan yeca ama yajuanti tlen noja mocahuaj nojquiya inmechtanaxtequilise. Tlahuel miyac tlacame inquinmictijque. Tlahuel chicahuac inquitehuijque ni tlali, huan ni altepetl huan itlacaiahua.

⁹ “Tlahuel inteicneltique imojuanti tlen inquitemitijtoque imochajchaj ica tlamanli tlen san inquiixtectoque. Inmoilhuíaj para tlen inquipiyaj inmechsehuis huejcapa huan inmechmanahuis tlen nochi tlamanli tlaohuijcayotl. ¹⁰ Inquichijtoque tlamanli tlen quihualicatoc pinahualistli ipan imochajchaj. Inquinmictijtoque miyac tlacame ipan tlahuil miyac altepetini, yeca inquihiicaj miyac tlajtlacoli hasta ayoc quinamiqui initztose. ¹¹ Pampa hasta nopa tetini huan nopa cuatetomitl tlen eltoc ipan tepamitl huan inincalpani nopa caltini tlen inmoaxcatijtoque nechtzajtziláj para ma nimechtlatzacuiltyil.

¹² “Inteicneltzitzti tlen inquiucualtlalíaj se altepetl ica tomi tlen inquitlantoque pampa intemic-

tijke huan ica tomi tlen tlamantli tlen intex-tequilijtoque. ¹³ TOTECO Tlen Quinyacana Iel-huicac Ejcahua Ma Tlatlanitij quitlalijtoc para elis san tlapic intequititoque huan san tlapic in-mosiyahuiltijtoque pampa nochi tlen inquiixtec-toque tlatlas huan elis san cuanextli quema ya-jaya tetlajtolsencahuas. ¹⁴ Pampa monechcahuía tonali quema ihuextilis TOTECO quitemitis ni tlal-tepactli huan senquistoc nochi tlacame quiitase huan quimatise. Temis tlaltepactli queja nopa miyac atl quitemitia hueyi atl.

¹⁵ “Tlahuel intecneltique tlen inquimacaj tlaili se tlen imocalnechca huan teipa inquiihuintíaj ica tlen chicahuac hasta huetzis tlalchi huan momim-ilos para inquitlachilise itlacayo xolotl. ¹⁶ Pero ica se tlalochtli imohueyitilis elis pinahualistli pampa TOTECO inmechtlatzacuilitis ica inejmatl. Huan imojuanti nojquiya inhuetzise huan inmomim-ilose huan tlanemijya elis imotlacayo huan in-mopinahuase. ¹⁷ Inquintzontejque nopa cuatini tlen eltoyaj ipan tlali Líbano huan ama mocuepas ipan imojuanti, pampa inmechtzontlamiltise sequinoc. Queja inquinmajmatijque nopa miyac tlapiyalime napano, ama nojquiya inmomajmatise. Queja nopa elis pampa inquinxolejque miyac altepetini ipan ni tlaltepactli huan inquinmictij-toque miyac tlacame.

Ax tleno ininpati totiotzitzi huan tlaixcopincay-ome

¹⁸ “Ax tleno quipalehuía se tlacatl tlen qui-hueyichihuas se tlaixcopincayotl tlen san tlamachijchihuali. Ax tleno ipati se totiotzi tlen quisencoajtoque ica tepostli tlen quimolonijque

ipan tlitl. San quichihua para se quineltocas se istlacatili huan moilhuis para ya nopa se dios, pero ax neli. Nelía huihuitic se tlen quinchihuá totiotzitzí tlen ax huelise camatise huan teipa motemachis ipan tlen yajaya quinsencajtoc.

¹⁹ Fiero elis para nopa tlacatl tlen quicamahuía se tlamatli tlen cuahuitl huan quiilhuía: ‘¡Xiitzto!’ O quiilhuía se tlamatli tlen tetl tlen ax hueli camati: ‘¡Xiisa!’ ¿Inmoilhuíaj para huelis camatise nopa totiotzitzí huan tlamachtise tlen cuali para sequinoc quichihuase? ¡Axtle! Yonque quinxajtoque nopa totiotzitzí ica oro huan plata, ax tleno hueli quichihuase pampa ax quipiyaj yolistli.

²⁰ “Pero TOTECO itztoc ipan itiopa tlen tlatzeloltic. Ma ax molinica iixpa nochí tlen itztoque ipan ni tlaltepactli pampa tlahuel monequi tijtlepanitase.”

3

Itlamaijtol Habacuc

¹ Ya ni itlamaijtol Habacuc tlen yajaya huicac iixpa TOTECO:

² TOTECO, na nijcactoc motlajtol huan nelía nimomajmatía huan nimitzhueyitlepanita ipampa nochí nopa huejhueyi tlamatli tlen tijchijtoc. Ipan ni tonali quema tlahuel titlaijiyohuíaj, sampa xijchihua nopa huejhueyi tlamatli huan xitechpalehui queja tijchijqui ipan nopa tonali tlen huejcajquiya. Yonque tlahuel ticualantoc tohuaya, xiquilnamiqui para ta hueyi moyolo huan xitechtlasojtla.

³ Niquita para Toteco Dios tlen Tlatzeloltic huala tlen altepetl Temán huan tlen tepetl

Parán. Itlatlanex huan ihuextilis quitemitijtoc elhuicactli, huan quihueyitlalíaj tlacame tlen itztoque ipan nochí tlaltepactli. ⁴ Yajaya petlantihuala huan tlahuili quisa ipan ima queja tlapetlanilotl. Huan quinextía nopa hueyi chicahualistli tlen motlatijtoc imaco. ⁵ Iixpa eltoc queja tlayacanaj miyac cocolistli tlen temictíaj. Huan campa iicxihua panotiyohui mocahua tlicoli xaxahuacatoc. ⁶ Quema yajaya moquetza se tlalochtli, nopa tlali mohuijhuisohua. Huihuipicaj tlaltini quema yajaya quintlachilía. Iixpa ya huelonij nopa tepetini tlen nochipa moquetztoyaj huan ixpolihui nochí tlachiquili tlen eltoque tlen huejcajquiya. Pero yajaya nochipa itztoc. Nejnentihuajtloc tlen ipejya tonali. ⁷ Niquita para nopa tlacame tlen tlaltini Cusán huan Madián tlahuel majmahuij pampa quimatiñ nopa tlaijiyohuclistli tlen quinajsis.

⁸ TOTECO, ¿huelis ticualaniyaya ica nopa atlajtli huan atemitl quema huejcajquiya tiquintlapo? ¡Ax neli! Ta tiquinmaquixtiyaya motlacajhua quema tihualajqui ipan nopa tlatehuijca carros ica inincahuayos para titechpalehuis. ⁹ Ta tijnexti mohueyi chicahualis quema ticalmatqui. Tijpixtoya mocuahuitol huan mocuatlamíhua momaco pampa queja nopa tiquntencahuilijtoya motlacajhua para tiquinpalehuis. Ti-jtejtejqui nopa tlali ica miyac atemitl. ¹⁰ Nopa tepetini huihuipicaj quema mitzitaj, huan huetzi tlen elhuicac tlahuel miyac atl. Tlejco nopa atl tlen eltoc tlatzintla tlali ipan nopa huejhueyi atl. Tlahuel caquisti queja se tlen tzajtzi chicahuac huan eltoc queja nopa atl momatlalana moixpa.

11 Ne tonati huan metztlí moquetzque nepa el-huicac. Mocuatlaminhua tlen tlahuél tlahuiyaya huan petlaniyaya quinixmictijque.

12 Ica hueyi cualantli tinejnenqui ipan ni tlaltepactli, huan ininpan timoquejquetzqui nochí tlaltini. **13** Tihuala para tiquinmaquixtis motlacajhua tlen tiquintlapejpenijtoc huan nopa Tlanahuatijquetl tlen ta ticaltijtoc. Tiquintzonxamanis nopa tlajtlacolchihuani huan tiquintlamixolohuis tlen iniicxi hasta ipan inintzonteco.

14 Ica yajuanti inintepos, tiquinmictía nopa tlatehuiani tlen hualayayaj queja se hueyi ajcomalacatl para techxolehuase tiisraelitame. Moilhuiyayaj ax ohui techtzontlamiltisquíaj. **15** Tinejnenqui ipan hueyi atl ica mocahuayojhua. Huan nopa atl tijmontono ipan sesen lado.

16 Quema nijcajqui nochí ni tlamantli, nelía nimajmajqui. Notenxipal pejqui huihuipica ica majmajtli. Noomiyohua huan noicxihua ayoc quipiyaj tetili para nimoquetzas. Na nijpiyas noyolo huan nijchiyas nopa tonali quema TOTECO hualas huan quintlatzacuiltis nopa tlacame tlen amantzi techtlaijiyohuilitaj.

17 Huajca nipaquis yonque ax xochiyohuas nopa higo, huan ax tlaquis xocomecatl, huan ax temacase inintlajca olivo cuatini. Nijpiyas paquilibrium yonque ax oncas pixquistli ipan mila, huan miquise nochí borregojme huan ax itztose huacaxme ipan tlatzactli. **18** Yonque ax tleno oncas, na nimopaquilibriumcas ipan TOTECO. Quena, niyolpaquis ipan Toteco tlen techmaquixtis. **19** TOTECO Dios nechmacas chicahualistli.

HABACUC 3:19

x

HABACUC 3:19

Huan ipampa ichicahualis nechchihuas na ma
ninejnemi chicahuac queja se masatl ipan nopa
tepetini tlen más huejcapa.

**Itlajtol toteco: Santa Biblia
Bible without Deuterocanon in Nahuatl, Huasteca
Oriental (MX:nheBI:Nahuatl, Huasteca Oriental)**

copyright © 2005 Wycliffe Bible Translators, Inc.

Language: Nahuatl, Huasteca Oriental

Dialect: Huasteca Oriental

Translation by: Wycliffe Bible Translators, Inc.

Náhuatl, Huasteca Oriental [nhe], Mexico

Copyright Information

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Huasteca Oriental

© 2005, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

6e359f6d-e93f-5d56-819d-a3feae810a1b